

COVID-19: 57 kes baharu, 23 kes sembuh

Astro Awani

31 Mei 2020

Hasimi Muhamad,

PUTRAJAYA: Sebanyak 57 kes baharu COVID-19 dikesan di negara ini setakat hari ini, menjadikan jumlah kumulatif kes positif meningkat kepada 7,819 kes.

Ketua Pengarah Kesihatan, Datuk Dr Noor Hisham Abdullah berkata, daripada jumlah tersebut hanya empat kes penularan dalam negara telah dikesan melibatkan warganegara Malaysia.

Dalam pada itu, sebanyak 23 kes lagi telah pulih dan dibenarkan discaj setakat Ahad, sekali gus menjadikan jumlah sembuh sepenuhnya daripada COVID-19 adalah sebanyak 6,353 kes atau 81.25 peratus daripada jumlah keseluruhan kes.

“Oleh itu, jumlah kes aktif dengan kebolehjangkitan COVID-19 adalah 1,351 kes. “Mereka telah diasingkan dan diberi rawatan. Ingin dimaklumkan daripada 57 kes baharu yang dilaporkan, 10 kes adalah kes import yang mendapat jangkitan di luar negara.

“Daripada 47 kes penularan tempatan, 43 kes adalah kes bukan warganegara Malaysia di mana 24 kes dikesan di depoh Imigresen Sepang dan 15 kes di Pahang yang merangkumi tiga kluster pekerja bukan warganegara, dan satu masing-masing kes bukan warganegarea dari kluster Sungai Lui yang bekerja di Klang, PATI dan satu kes kluster Pudu,” demikian kata beliau dalam sidang media harian, di sini pada Ahad.

Selain itu, beliau menambah Kementerian Kesihatan (KKM) hari ini memaklumkan tiada sebarang kematian direkodkan di negara ini akibat COVID-19.

Bagaimanapun Dr Hisham berkata, seramai sembilan kes positif COVID-19 sedang dirawat di Unit Rawatan Rapi (ICU), dengan dua daripadanya memerlukan bantuan pernafasan.

“ Justeru, jumlah kumulatif kes kematian COVID-19 di Malaysia kekal sebanyak 115 kes (1.47 peratus daripada jumlah keseluruhan kes),” katanya.

**© 2020 Astro Awani Network Sdn. Bhd.
(535275-D) All Rights Reserved.**

Source: <http://www.astroawani.com/berita-malaysia/covid-19-57-kes-baharu-23-kes-semuh-245045>